



DEO OPTIMO MAX.

UNI ET TRINO,

VIRGINI DEIPARÆ, ET S. LUCE
Orthodoxorum Medicorum Patrono.

QUÆSTIO MEDICO - CHIRURGICA,

QUOD LIBET ARIIS DISPUTATIONIBUS

manè discutienda in Scholis Medicorum die Martis 12^a Aprilis.

M. DCC. XL.

PRÆSIDE DOCTORE MEDICO

M. JACOBO BENIGNO WINSLOW,

Regiæ Scientiarum Academiæ Socio, &c.

*An mortis incerta signa minus incerta à Chirurgicis, quàm
ab aliis experimentis?*

I.



ORS certa; mors incerta. Moriendum esse, certum omnino; mortuum esse incertum aliquando. E feralibus involucris, è feretris, imò è tumulis evasisse quamplures decessisse creditos, compertum est. Compertum itidem, præcipitanter humatos non nisi præposteram obiisse mortem, morte eorum, quos funis ac rota necant, multò magis horrendam. Compertum præterea, præfestinata anatome traditos, nondum finitæ vitæ notas ipso plagæ funestæ momento dedisse

manifestissimas, pudore scrutatoris incauti maximo, maximâque fami-
liæ superstitis indignatione comitatas. Fabulantur, ais, qui talia nar-
rant. DUNS SCOTUM in tumulo momordisse brachia; idemque ZENONI
Imperatori post iteratos & ab excubantibus auditos ejularus accidisse;
nugas opinaris. Transeant hæc, licebit. Non licebit itidem testes re-
pudiare probatissimos, integerrimos, oculos, imò etiamnum super-
stites. Profectò, inquit æstimatissimus Iatrophilorum Mæcenas ac Pon-
tificis Maximi fel. record. CLEMENTIS XI. Archiater LANCISIUS
(*De mori. subit. L. I. C. 15. N. 2.*) non ex aliorum duntaxat histo-
riis nobis innotuit, multos qui decessisse credebantur, vel prope se-
pulchra evigilasse, sed & nostro etiam experimento idipsum recorda-
mur in Viro nobili, adhuc vivente, qui viginti ante annos, cum ei
justa persolverentur in Templo, ad motuum sensuumque munia, om-
nium cum terrore magis quàm admiratione rediit. Juvenis quidam,
refert consultissimus ille Romanorum Medicus P. ZACCHIAS (*Qu. Med.
Leg. To. 3. Conf. 70. N. 2.*) in archihospitali S. Spiritus... peste cor-
reptus est, ex cujus violentia in syncopen lapsus pro mortuo elatus est,
ejusque corpus inter cadavera peste sublata ejectum, cum quibus dum
vespillones parant illud naviculâ per Tiberim ad destinatum locum as-
portare, ille vitæ aliquem sensum præbuit, unde ad hospitale delatus,
& utcumque ab eo symptomate sese recolligens, post duos dies in
novam syncopen lapsus, unde iterum ejus corpus inter cadavera justò
sublata conjectum est, cum illis terræ demandandum: sed denuò re-
viviscens, aptisque medicamentis recreatus, tandem à morbo in totum
liberatus, adhuc in vivis degit. Sed in hac eadem peste hîc Romæ alios
non adhuc vitâ destitutos pro mortuis sepulchro demandatos esse scimus.
Ingenuitate nunquam satis laudandâ fatetur peritissimus quondam Chi-
rurgus Parisiensis, PHIL. PÉRI. (*Prax. Obstetr. L. 2. C. 2. §. 2.*) sese,
ut in gravidâ, quamque, nullo circa præcordia motu, nec ullo ad spe-
culum halitu percepto, mortuam ipsemet crediderat, sectionem Cæsa-
ream institueret, instanter rogatum, instrumento vix admoto, trepida-
tionem corporis, stridorem dentium, motumque labiorum ejusdem
observasse, ac tanto hinc terrore perculsum fuisse, ut deinceps
operationi isti se numquam accincturum fore voverit, nisi de morte
prægnantis certo certiore factum. Idem ferè non ita pridem illustri-
ssimi cujusdam viri corpus ante elapsas à morte creditâ viginti quatuor
horas secanti contigisse fertur: similique tragædiâ ad incitas redactum
fuisse Principem Anatomicorum sui sæculi VESALIUM, satis superque
constat. Verùm enimverò testes hodiernos, imò viventes delideras.
Reservatis aliî occasione testimoniis aliorum quamplurimum, eni-
quos, quandocumque libitum fuerit, ipsemet auscultare poteris. Testa-
tur spectatæ integritatis Reverendus PATER LECLER, antehac con-
victus in Collegio LUDOVICI MAGNI Procurator jamdiu cognitissimus,
sororem primæ Patris sui Uxoris in cæmeterio publico Aurelianensi
cum annulo digitum ornante humatam fuisse: subsecutâ postea nocte

sandapilam, spe lucri; famulum detexisse, eodemque digiti, cui stridè nimis inhærebat annulus, amputationem moliente, sepultam illico dolorem sibi fieri exclamasse: perterrito & in fugam mox consternato fure, ipsam, divulsis linteis, ædes suas petiisse, posteaque circiter decennium vixisse, ac, prole interim editâ, vitam mariti superâsse. Testatur integerrimæ fidei Sacerdos, DN. M. JOSEPHUS MARESCHAL, Ecclesiæ Metropolitanæ Parisiensis Capellanus, ac S. Joannis à Motta apud Cenomanos Prior, anno 1714. circiter, dum transiret per plateam Joannis Robert dictam, se vidisse mulierem lodice laneâ coopertam, ante fores domûs in bisellio sedentem juxta loculum, in quo illuc delata, & è quo jamjam extracta fuerat. Testatur idem anno 1722. vel 1723. se vidisse & audivisse vespillonibus vicum Joannis Floridi petentibus obvios clamantes, non mortuum esse, quem quærebant, sed è feretro ereptum vivere. Testatur peritissimus Chirurgus Parisiensis D. BENARD, se adolescentulo unâ cum Patre pluribusque adstantibus in Parochiâ Réol præsentem, Religiosum Ordinis S. Francisci, jam à tertio vel quarto die tumulatum, è sepulchro protractum fuisse adhuc viventem ac spirantem, manibus circa ligaturam commotis, sed è vestigio ferè extinctum; imò perscripta fuisse coram judicibus acta rei gestæ, cujus occasionem dederat epistola amici monentis eundem catalepticis insultibus obnoxium esse. Testatur honestissima vidua D. LANDRY, peritissimi olim Calcographi, Patrem suum straminibus per aliquot horas mortui instar impositum, post aquam salitam ori infusam, suadente, quæ verè mortuum esse perseveranter negaverat, amicâ, denuo diuque postea vixisse. Allegata hæcce impræsentiarum sufficiant, ut quod celeberrimus LANCISIUS: Quis ignorat, inquit, pestis tempore omnem rem non nisi tumultuariè peragi; ac perinde leve dumtaxat studium ad secernendos venos à psendo mortuis adhiberi; idem nobis non modò liceat, verùm etiam nos oporteat, de quovis epidemiorum tempore, de præfestinatorum in Xenodochiis, in suburbiis alibique funerationum frequentia, vindictam, mortis violentæ in ipsis cæmeteriis clamante, ac de horrendis semivivorum imò fortè viventium post bellicosos conflictus humationibus præproperatis, suspicari.

I I.

NE finitæ quidem vitæ satis certas notas esse, virum jure magni nominis Democritum proposuisse, tradit Hippocrates Latinus, (L. 2. C. 5.). In apoplexiâ, syncope, suffocatione, tum verâ strangulorum, oppressorum, submersorum, locis angustioribus inclusorum, halitibus noxiis insectorum &c. . . tum spuria sive nothâ hysteriarum, hypochondriacorum, vehementioribus animi passionibus percussorum, aliisque ejusmodi affectionibus, sæpenumero incerta fallunt incertæ mortis signa, non tam artis crimine, quàm aut imperitiâ aut negligentia artem profitemium atque exercentium, ut & adstantium vel incu-

riâ, vel inopiâ, imò quandoque malitiâ. Faciei rubor, calor trunci, artuum flexibilitas mollitudo, incerta vitæ nondum finitæ signa: omnino finitæ pariter incerta vultus pallens, frigans truncus, extremitates rigidæ, motuum sensuumque externorum cessatio. Vitæ superstitis signa omnium certissima Pulsus ac Respiratio, quippe sine quibus omnino perit. Cave, credas defuisse geminos hosce motus, quotiescumque intuitu tactuve eosdem non offenderis. Scrutare paulisper utriusque tractum. Pulsum, quem in recto vel reclinato carpo non senseras, in eodem leniter incurvato fortè reperiis: hic nimirum laxa cruori quantumvis leniter appellenti cedit arteria; isthic tensa viam præcludit: ille, qui circa Radii basin profundius hæret, pollicem inter & os metacarpi vicinum fortè patebit. Cave interim, rudiori pressione languentem hic pulsum tactui tuo ipsemet subducas. Nec minùs cave, arteriolarum in digitis propriis micaciones arteriis carpi istius attribuendo, vivum existimes qui verè mortuus est. At nullo hisce in locis occurrente pulsu, omnia conclamata non illico judicandum. Temporum arterias explora; quibus neque perceptis, carotides canalibus cæteris ampliores, emboloque vitæ directius agitata consule, digitis non leviter, ut alibi, sed profundius sub posticâ alterutrius Muculi Sternomastoidei crepidine appressis. Id quod etiam versus inguina in arteriis cruralibus prudenti exercitatorum digitorum tactu probè observandum. Præter hæc, sive ultimò, etiam in ipsis præcordiis inquirenda tum finitæ tum non finitæ vitæ signa; inquirenda verò, non supino corpore, sed in latus ferè converso, non sinistrum duntaxat, sed etiam dextrum. Corpore supino, cor spinam versus aliquomodo subscdere, adeoque à costis remotum, jam leviusculè, jam vix ac ne vix, imò nullatenus præcordia ferire, quilibet experiri potest. Cor plerumque ad latus sinistrum oscillare solet, sed in nonnullis dextrorsum pulsaret observatum, in iis scilicet, in quorum postea cadaveribus inversa tum pectoris tum abdominis reperta fuere viscera: qualis quidem situs insolitus fortè non semel in affectibus jecoris, lienis, intestini coli, præsertim cæci sive capitis coli, curandis fefellit. Nihilominus quantalibet adhibita diligentia in prædictis casibus, quandoque ita latent cordis æquè ac arteriarum ictus, ut nisi alias aliunde notas simul quæseris, mortuum judicares, quem vivere rescisces postmodum. Non minùs dubia in isto rerum statu dubiæ mortis indicia promit scrutinium Respirationis. Conspita hæc & veluti sepulta quandoque torpet, ut neque visui neque tactui vel levissimus circa thoracem motus pateat. Scilicet uti debiliores cordis & aortæ vibrationes, unà cum libero quamvis placidissimo aëris externi ad intimos pulmonum recessus allapsu, vitæ aliquamdiu potrahendæ sufficiunt, absque ullo propemodum in arteriis exterioribus ictu manifestò, ita sola ferè vis elastica bronchiorum & vesicularum, levioribus cordis & arteriæ pulmonaris trepidationibus adjuncta, vicem manifestæ respirationis aliquatenus supplere poterit. Verum enim verò quamvis organa circuitui sanguinis interveniant

5
ulteriùs explorandi viâ defint, non modò Respirationis, sed sensuum motuumque instrumenta penitus inquirere poteris, quinimo debes, ne fortasse quem mortuum judicaveras, per temetipsum & vitâ & salute demum privetur.

III.

UT à verè mortuïs distinguerentur ii, de quorum morte dubitari posset, varia varii experimenta proposuêre. Respirationis sopitæ ac veluti sepultæ signa quærentes, vel cerei accensû flammam ori naribusque leni & inconcussâ manu admovent, atque istâ huc illuc vacillante, modò non aliundè motus ille tremulus exciteretur, vitam nondum finitam existimant; flammâ verò quiescente, finitam augurantur. Tenuissimorum lanæ carptæ vel gossypii flocculorum ope idem alii autumant. Incerta profectò signa. Id ipsemet vivens vigenque levissimo respirationis halitu, quotiescumque libuerit, experiri poteris. Nec minùs incerta ex halitu speculum ori ac naribus admotum offuscante signa esse, testantur consimiles ferè vapores ex ore naribusque verè defuncti adhuc calentis exsurgentes. Ab aliis vasculo aquæ pleno super apophysin seu epiphysin xiphoidem supini ac prorsùs immoti corporis posito, vitam motus aquæ, quies verò mortem notare creditur. Consultius foret, non supino ad amussim corpore id fieri, sed in latus alterutrum eatenus converso, ut extrema costæ antepenultimæ cartilago supremum obtrineat situm, eique, ad manifestandum vel levissimum in pectore motum xiphoidæ multò magis dispositæ, vasculum imponatur. Cæterùm, immotis omninò costis, lento, subtili ac placido solius diaphragmatis motu in prædictis casibus aliquando peragi posse Respirationis opus, ut aqua vasculo contenta nullatenus moveatur, experientia docuit. Cave nihilominùs, fermentantium in abdomine verè mortui humorum allapsu vasculum commovente decipiaris. Neque tentatis incassum hisce, mori tuâ culpâ finas, quem nondum obiisse, imò nondum nisi tuâ negligentia moriturum esse, alia insuper probare poterunt. Nares sternutatorii, errhinis, salibus, liquoribus acutis, magmate sinapis, succo cæpæ, allii, raphani rusticani &c. pluvularum aut penicillorum ope irritandæ. Gingivæ iisdem sæpiuscule ac fortiùs affricandæ. Verberibus, urticibus, &c. vellicanda tactûs organa; enematis, flatu, fumo intestina. Inflexionibus & extensionibus commovendi artus. Aures sono, clamore, strepitu molestandæ; cavendo tamen, si nullum omnino signum auditûs, ne quidem levissimo palpebrarum, labiorum, digitorumve, aut aliarum partium motu dederit, quem examinas, ipsum non audire illico iudices. Uti enim primum movens cor esse censetur, ita ultimum sentiens auditûs organum esse testantur ii, qui omni alio sensu privati singula distinctè tunc audita postmodum referunt. Testatur idem historia Theologi, qui moribundo nullum auditûs signum edentidandam non esse absolutionem priùs docuerat, at cum ipsemet gravissi-

6
mo correptus deliquio, & omni interim motu orbatus singula ab adstantibus prolata audiverit, se nentiam deinceps mutavit.

I V.

ULTIMO ab illa Medicinæ parte, cujus olim effectus evidentissimos Celsus ipse prædicavit, finitæ vel non finitæ vitæ notas exquirere necessum est. Chirurgica, quæ detegendis illis aptiora putantur experimenta, pungendo, secando, urendo, potissimum peraguntur. Diæresibus hisce velut à morte ad vitam quandoque revocati sunt, quos non aliter ac statuas aut truncos alia quævis affecerant tentamina. Nimirum tenuissimæ extremarum, quibus organum tactus imprimis constat, nervorum fibrillæ, violento cuspidis, cultelli, ignisque impulsu vellicatæ, divulsæ, disruptæ, atque epidermidis operculo denudatæ, exquisitissimas dolorum perceptiones ad commune, uti vocant, sensorium usque, viâ hætenus inexplicabili ac celeritate promiscuâ, continuant. Punctiones in volis manuum, pedumque plantis, scarificationes scapularum, humerorum, brachiorum &c. efficacia quandoque reperta sunt circa dubiam mortem experimenta. Felici licet temerario ausu quidam prælongam aciculam sub ungue digiti pedis mulierculæ apoplecticæ nullum vitæ signum præbentis adigens, momento citius illam excitavit. Sectionibus paruisse notas vitæ nondum finitæ, satis probant allata superius exempla. Efficacissima tandem judicantur dubiam mortem explorandi tentamenta, quæ ab Ustione desumuntur. Ita plebeios aliquot, quos nullum quantumvis validum atroxque remedium à fortibus apoplexiis excitaverat, ad vitam subito revocatos per admota plantis pedum ignita ferramenta fuisse, memorat suprâ laudatus ac nunquam satis laudandus LANCISIUS, (lib. 2. cap. 5. n. 11.) Eadem eundem in scopum vertici capitis imponenda alii suadent. Pari quoque successu manibus, brachiis, aliisve in cute locis applicari possunt aqua fervida, cera vel simplex liquefacta vel Hispanica incensa, funiculus ardens. Huc etiam referri queunt Frictiones validæ, exemplo Medici, qui cum in decumbente pro mortuo habito membra adhuc flexibilia animadvertisset, quamvis nullo pulsu, nullo per admotum ori gossypium halitu, nullo per enema quantumvis acre effectu, plantas pedum fetaceo fortissimæ mutiæ immerso per tres horæ quadrantes continuâ frictione fortissimâ tractando ad vitam revocavit. (Eph. Nat. Cur. Dec. 1. an. 8. pag. 159.) Nihilominus ista quoque, licet aliàs efficacissima, sperato caruisse successu experimenta, missis aliis exemplis, sola instar omnium Regiæ Scientiarum Academiæ communicata evincit historia de milite quodam ignita ferramenta nullatenus sentiente, salvis licet omnibus motuum voluntariorum organis.

QUID indè, quorsum tot molimina, ais? Quænam sic pungendi, secandi, urendi ratio? En! *Quia me vestigia terrent*, ipsum me ferali bis additum involucrio, primâ vice puerum, adolescentem secundâ, judicante Medico. Præterea, jamdudum monente ZACCARIA, non debet hominum vulgus peritos Medicos irridere, si nonnulla circa eos, qui mortui putantur, aut verè mortui sunt, machinantur, ut eos deprehendant, an vita adhuc supersit, necne. (*Qu. Med. Leg. Tit. 1. q. 9. n. 54*). Locum hîc mereretur, quod ex Fabio exclamante citat inelytissimus LANCISIUS (*de Mort. sub. l. 1. cap. 15*.) Unde putatis inventos tardos funerum apparatus? Unde quod exequias planctibus, ploratu, magno semper inquietamus ululatu? Quàm quod vidimus frequenter post conclamata suprema redeuntes. Prudenter itaque lege vetitum est, addit ibidem Celeberrimus Archiater, quoscumque mortuos, & eos præteritum, qui repenti decesserunt, statim sepelire: rogatque deinceps, (*cap. 16*.) non tantùm Medicos, sed etiam pios qui ex instituto animæ assunt, ut indicii utantur propositis, utque Medici firmata novis experimentis inveniant præsidia, quorum ministerio ægri vel à morte penitus vindicari, vel saltem tantum temporis lucrari valeant, ut crimina vitæ (quod cardo rei est) sacræ Exomologesi expiare, seseque Numini commendare possint. (*Lib. 2. cap. 5*.) Non absumile pietatis Medicæ specimen jam olim dederat Oraculum Scholæ Parisiensis ROLANDUS, ubi de suspensorum cadaveribus, sectioni anatomicæ destinatis: Quamdiu, inquit, calet corpus, si parùm distat à suspensio, incendi non debet, quoniam humanitas & pietas à nobis exigunt, ut si quis vitæ nondum extinctæ spiritus affulgeat, omni arte suscitetur, ut vita misero restitatur ad pœnitentiam agendam. At verò quandoquidam, præcipuè in casibus memoratis, nulla absolute certa finitæ vitæ signa, præter livescences in corpore maculas, atque exhalantem inde fœtorem cadaverosum, ab alio quovis fœtore, etiam stercoreo, ut & ulceribus quibusdam proprio, distinguendum, hæcenus inventa sint, tutissimum erit, edulque in lecto relinquere obisse creditum, relictis simul circa eundem tanquam vivum stragulis, tegmine ac pulvinari, nec nisi post biduum triduumve, toto corpore inter ipsa eadem stragula frigatefacto, artubusque planè rigentibus, ferali apparatu tractare. Cedro dignissima præclari Venetorum Machaonis TERENTI Sententia hæc: (*De causis mort. repent. Sect. 6. cap. 1*.) Cum ex dictis satis constet, vitam omni vitali functione interdum ita frustrari, & ita latenter includi, ut à cadaveribus hujusmodi corpora nihil differre videantur; ideo, ne pietati & Christianæ Religioni, viventia adhuc tumulando, injuria aliqua fiat, debitum tempus statuendum est, quo vitam, si qua lateat, suscitari, expectare debemus. Est autem (ut inquit major Auctorum pars) spatium trium dierum naturalium, quod septuaginta duabus ho-

ris perficitur &c. Quod si hoc tempore nullum vitæ vestigium conspiciatur, sed potius pravum odorem cadavera emiserint, certæ mortis argumentum clarissimum existit, & tunc ullo absque scrupulo talia corpora reponenda. Huic Sententiæ subscribens Consultissimus ZACCCHIUS: Pro certo ergo concludendum, ait, hominem verè mortuum non nisi incipiente putredine cadaveris certò cognosci posse. (To. 3. Conf. 79. n. 21.) Non mirum itaque, testamento cavisse quosdam, ne vitam cum morte omnino commutasse putati è lecto ad feralia extrahantur, nisi elapsis ad minimum horis quadraginta octo, factisque prius ferro & igne experimentis minùs incerta mortis signa manifestantibus. Idem ferè non ita pridem initio currentis anni testamento Nobilissimæ Canonice D. de CORBEVILLE cautum, atque à Perillustri Hærede ad amussim observatum fuisse, cuilibet pernotuit. Imò idem cæteraquæ antè exposita, ut & alia ejusmodi, fiant nobismet ipsis in eodem versantibus statim enixè obtestamur.

Ergò mortis incerta signa minùs incerta à Chirurgicis, quàm ab aliis experimentis,

DOMINI DOCTORES DISPUTATURI.

M. Joannes-Baptista Dubois, Professor Regius.	M. Ludovicus - Joannes Le Thieullier, Regis Consultarius & in Majori Consilio Medicus ordinarius.	M. Ludovicus - Claudius Bourdelin, Ex-Decanus, Academia Censor, & Regiæ Scientiarum Academia Socius.
M. Guillelmus-Josephus De l'Epine.	M. Nicolaus Le Roi de S. Aignan.	M. Michaël - Ludovicus Vernage.
M. Ludovicus - Hieronimus Cosnier, Pharmacia Professor.	M. David Vasse.	M. Joannes - Franciscus Leaulié.

Proponebat Parisiis, LEANDER PEAGET, Parisinus,
Baccalaureus Medicus, A. R. S. H. 1740.
à sextâ ad meridiem.